

EDIYOM IKPIKPU ÑKPỌ ERERIMBOT

Ecclesiastes 1:1-18; 2:1-26

ỌYỌHỌ UKPEP-ÑKPỌ 376

Eke Ikpọ Owo

IKỌ IBUOT: “Koro enye (Abasi) adade eti-ibuot, ye ifiok, ye idaresit, ọnọ owo eke ọfonde enye ke iso: edi ama edi idiok owo, Enye ọnọ enye utom, ete oko, onyũ obon, man ada ọnọ owo eke ọfonde Abasi ke iso” (Ecclesiastes 2:26).

I Ikpikpu Ñkpọ Ererimbot Emi

- 1 Ọkwọrọ-ikọ owut ete ke obufa ñkpọ iduhe ke ererimbot. Kpukpru ñkpọ esasaña ekanare, Ecclesiastes 1:1-11; Psalm 62:9; Ñwed Mbon Rome 8:20
- 2 Enye ekesin esit esie ndidunṣore ke ifiok mme ñkpọ emi enamde, onyũ okut ete ke emi ñko edi editimere esit, Ecclesiastes 1:12-18; 7:23-25; 1 Ñwed Thessalonica 5:21
- 3 Enye ama eme (gold), mme ebre-ndido ye mme okwọ-ikwọ, edi kpukpru ewọrọ ikpikpu ke edade edomo ye ata eti ñkpọ, Ecclesiastes 2:1-11; Luke 12:19
- 4 Ndien enye ese ifiok ye ndisime onyũ okut ete ke ifiok okoñ akan ndisime kpa nte uñwana akande ekim, edi ke ñkpọ kiet otibe ọnọ kpukpru owo, Ecclesiastes 2:12-17; 8:1; Psalm 49:10; Mme Ñke 17:24
- 5 Enye ama odomo oto ke ifiok esie okut ete ke ata inemesit ye eti ñkpọ itoho ke nsin-ifik owo, edi eto ke ubok Abasi, Ecclesiastes 2:18-26; Job 27:16, 17; Mme Ñke 28:8

SE EKPEPDE EBAÑA

Se Solomon Okoyomde Ke Uwem Emi

Idaha utom emi Ecclesiastes anamde edi ndiyarare ñwut ete ke kpukpru edisin ifik nyire ke mme ñkpọ uwem emi edi ikpikpu ke edade edomo ye edidiṣon emi odude ke ifiok Abasi oto ke eti erikpep. Enye owut ete ke kpukpru se owo anamde ndiyuhọ ukpọñ esie edi ikpikpu, edi ifiok Abasi ikpọñ edi se ifonde ikan.

Enam efiok ete ke Solomon ekewet Ikwọ Solomon ke ini uyen esie, kpa ini emi ima Abasi akabarade esit ye uwem esie. Enye akada spirit ewet abaña ñkpọ emi ke usuñ eke ọyọhọde ye akpanikọ. Ekikere edi nte ke enye ekewet Ñwed Mme Ñke ke ini enye ama okokpon ọwọrọ owo, ndien Ecclesiastes ekedi ekikere ini usọñ esie.

Mme Jew ekesikot Ecclesiastes ke isua ke isua ke ini usọrọ mme ataya. Ekot Ñwed akwa mfuho ke ini usọrọ akwa idaresit.

Ke ini ekenimde Solomon ke edidem Israel ke ini uyen esie, esit esie ama oyom Abasi. Enye okoyom emem, okoyom edinen-ido, okoyom ifiok man ekeme ndikpe ikpe akwa idut oro. Abasi ama ọnọ enye udọñ esit esie onyũ adian inyene, etop ye ukpono ọnọ enye. Ukara esie okokoñ akan eke kpukpru ndidem ererimbot ke ubọñ.

Enye ama odomo kpukpru ñkpọ ke uwem ndifiok se uwem akamade ke abaña inemesit owo. Enye okokut ete ke kpukpru ñkpọ esasaña ekanare. Eman a kiet ebe efep ndien efen ada itie. Utin asiaha ndien ọshuṣore onyũ ọsọsọ afiak ke ebiet emi enye okotode asiaha. Ofum ofofume kpukpru ini oto ke edere aka ke usok ndien aka iso akanare ntre. Kpukpru ñkpri inyañ efehe ekeduk akwa inyañ enyũ efiak ke ebiet emi mmọ eketode. Obufa ñkpọ ikoduhe ke idak utin. Se idude idaha emi ama ododu.

Enye ama esin esit esie ndidunṣore mbaña ifiok ke ndisime. Enye ama okut kpukpru utom emi ekenamde ke idak utin onyũ okut ete ke owo ikemeke ndineñere se ima ikakwaña, owo inyũ ikemeke ndibat se mikoduhe du.

Mbre Okpu

Solomon ke idaha efen ama odomo inemesit ye mmin ndise idaresit emi enye ekemedede ndinyene ke mbre. Enye ọkọdọhọ abañā imam ete “idat,” onyūñ ọdọhọ abañā mbre ete eti ñkpọ iduhe ke esit. Enye ama odomo mme itie usọrọ eke eñwọñde wine onyūñ okut ete ke wine edi asak nsahi, ọkpọsọñ mmin onyūñ edi ifiopesit: do ke enye ekewet ete: “Kuse wine ke ini enye oyibede, . . . ke cup.” Paul ọdọhọ ete, “Nte mbufo ifiokke ite mme imọ idi ifin inọ ñkpọ ekededede eke mme imọ iyakde idem inọ ndisuk ibuot nnọ enye” (Nwede Mbon Rome 6:16). Owo ifañ ekabare eduk ufin enọ ọkpọsọñ mmin! Solomon ama okut ete kpukpru emi edi ikpikpu.

Inemesit Iduhe Ke Mme Ufọk-iduñ Ye Añwa-mbre

Ke oro ebete, Solomon ama ọbọp ndiye ufọk, ọtọ iñwāñ vine onyūñ anam iñwāñ ye obube mmọñ, mme ñkpọ oro eyede ndise ke enyin. Enye akada isua 13 ndibọp ufọk esie. Ema esin ediwak okuk ye kpukpru utom-usọ emi mme anam-usọ ekekemedede ndinam ke ndibọp ufọk emi. Enye ama anam ndiye añwa-ofum, ọtọ ndiye eto onyūñ otibe mme obube mmọñ man osio mmọñ do ọduok ke iñwāñ ye mme eto emi. Ndusuk mme obube mmọñ emi ke esuk edodu tutu osim mfin emi. Enye ama enyene añwa-mbre inemesit ekpere ufọk esie emi eketode ndiye eto ye flawa. Enye ama ama se iyede. Enye ama odome ndinyene kpukpru se owo ekpekemedede ndinam ke ererimbot emi ndikpere paradise. Edi ndiye ufọk-iduñ, ndiye añwa inemesit ye kpukpru se okuk ye ubọk usọ ekemedede ndinam, ekasuk edi ikpikpu ye editimere esit.

Ikwọ Ye Nwede Mbuk

Enye ama odomo ikwọ ye ediwet ñwede, nda-mmana ifiok emi enye ekenyenede oto ete esie David. Etiñ enọ nnyin ete ke enye ekewet ikwọ tọsin kiet ye ition onyūñ etiñ ñke tọsin ita. Ewet abañā eto ọtọñde ke ndiye cedar ke Lebanon tutu osim ñkpri eto emi etibede ewọrọ ke ibibene. Enye ama onyūñ ewet abañā mme unam ikot, mme inuen enyọñ ye mme iyak ke mmọñ. Etop esie ama asuana ke ofuri isọñ. Mme ndidem ererimbot ema edi ndikop ifiok esie.

Ndiye Enañ Mbakara Ye Mme Ukpat-ñkpọ

Enye ama enyene mme enañ mbakara ye ukpat-ñkpọ emi ekeyede ekan: tọsin ufọk-enañ aba ye mme andiwat, tọsin duopeba. Enye ama enyene ufene ekese, ewak ekan kpukpru se ikodude ke Jerusalem. Enye ọkọtọñọ akpa mbon-ekọñ mmọñ emi ukara Israel ekenyenede. Enye ama onyūñ anyam urua ye mme ñkan-ñkuk idut.

Enye ama ada ifiok odomo ye ndisime onyūñ okut ete ke ifiok akan ndisime kpa nte uñwana akande edim; edi ñkpọ kiet, kpa mkpa, osim mmọ kpukpru.

Mbuk Akpanikọ

“Ntem ke edidem Solomon okpon akan kpukpru ndidem ke ererimbot, ke inyene ye ke eti ibuot. Ndien ofuri ererimbot eyom iso Solomon, kpañ ekpekop ifiok esie, emi Abasi ekesinde enye ke esit” (1 Ndidem 10:23, 24).

Adañemi Ọbọñ-añwan Sheba eketienede Solomon onyūñ obupde enye mkpọsọñ mbume, okonyūñ okutde ifiok esie, ufọk emi enye ọkọbọpde, udia emi enye adiaide ye idaha mme asaña-utom esie, idem ama akpa enye tutu odudu iduhe enye ke idem aba. Enye ọdọhọ ete, “Se ñkokopde ke edem nnyin ebañā ñkpọ fo, ye ifiok fo, edi akpanikọ.”

Uyuhọ Emi Otode Ubọk Abasi

Solomon ama odomo kpukpru ñkpọ ke ererimbot osim akpatre, mme ñkpọ oro ekedi: etop, ukpono, eti idaha, inyene, nti ufọk-iduñ, mme ukpat-ñkpọ ye mme enañ mbakara, ima iban, ndibre ye ndikwọ ikwọ, ndiwet mme ñwede, ye ndiwet mme ikwọ. Ikọkọñke ndinam baba ñkpọ kiet man enyene se ikemeke ndiyuhọ esit esie ke uwem emi Enye ikesinke ndinọ sededi emi enyin esie okoyomde. Enye ama oyom kpukpru ñkpọ man otim ọfiok se ifonde ye owo ye se itimde idi ata ñkpọ inemesit inọ nditọ owo mi ke isọñ. Edi Abasi omonim ebiet ke esit owo emi Enye ikpọñ-ikpọñ ekemedede ndiyuhọ. Edieke

Abasi miyuhọke ebiet oro ke Idemesie ye ima Esie, ufañ enyene ndidu emi ñkpọ isọñ emi mikemeke ndiyuhọ. Solomon, ke akpakip ifiọk esie emi enye okodomode okut ada ukpep-ñkpọ ete ke uyuhọ ye ata inemesit oto ke ubọk Abasi ikpọñ.

Paul, Owo Mbet

Yak nnyin imen se Solomon okoyomde idomo ye se Paul, owo mbet emi ekenode esọk Mme idut (Gentile), okoyomde. Enye ñko ama ọtọñọ ndiwọrọ etop. Enye ọkọbọ ukpep-ñkpọ ke ubọk Gamaliel kiet ke otu mme akwa andikpep ke eyo esie. Enye ọkọsọsọp ukot ebine akwa idaha. Edi ke usen kiet Jesus, owo Nazareth ama omum ikpat isañ esie. Ema ekpuhọre udọñ esit esie. Enye ama okut ediwak ukut, edi ke Jesus, enye ama okut kpukpru se enye okoyomde: ifiọk, edinen ido, edinam-asana ye uwọrọ-ufin. Baba ñkpọ kiet ikekemeke ndidianare enye ke ima Abasi. Ke akpatre uwem esie, enye ama ewet ete: “Mma ññwana eti eñwan, mma mfehe mbuba mi mma, mma nsọñọ mmum mbuotidem ñkama. Ema enim anyanya eti ido ebeñe mi” (2 Ñwed Timothy 4:7, 8). Enye ama enyene erikan ke akpatre. Enyiñ esie ọwọrọ ada ke otu ikọt Abasi nte ata akwa owo, ke ini Solomon ye kpukpru ifiọk ye inyene esie ọkọduode.

Emem Oto Ke Jesus

Solomon ke mme akpatre usen esie ama ọfiọk ete ke emem ye erikan oto ke ubọk Abasi ikpọñ-ikpọñ; ñko ke ediyom inemesit uwem emi mbe ke usuñ ererimbot, edi ikpikpu ye editimere esit.

Edieke Solomon ye kpukpru ifet emi enye ekenyenede ndinem idem esit, mikenyenene idara ke ebede ke Abasi, anie ndien ekeme ndinyene? Idara ke akpanikọ edi udeme ikọt Abasi. Peter ewet ete “Akanam mbufo ikwe Enye edi emama Enye; Okposuk edi nte mbufo mikwe Enye ke emi, mbufo ebuot idem ye Enye, enyuñ esọñọ edara ye idaresit eke ayañade owo nditiñ onyuñ ọyọhọde ye ubọñ” (1 Peter 1:8). Ke akpatre nduñọre esie, Solomon ọkọdọhọ ete, “Yak nnyin ikop utit ofuri ñkpọ emi: bak Abasi, nyuñ nim mbet esie: koro emi edi eke kpukpru owo” (Ecclesiastes 12:13).

Jesus ete “Koro nso udori ke owo edikut edieke enye adiade ofuri ererimbot, ndien ada uwem esie osio isop? Mme nso ke owo edinọ ke ibuot uwem esie?” (Matthew 16:26). Paul ete “Uteñe Abasi edi akwa udori ke ini asañade ye esit eke okutde ete se inyenede ekem” (1 Ñwed Timothy 6:6).

MME MBUME

- 1 Ñwed ifañ ke Ñwed Abasi ke Solomon ekewet?
- 2 Ke ema ekenim Solomon ke edidem, nso ke enye ekebeñe Abasi?
- 3 Nso ke Solomon eketiñ abaña utin, ofum ye inyañ?
- 4 Nso ke Solomon akañwana ndiyom ñkut ke uwem?
- 5 Enye okokut ete ata inemesit oto mmọñ?
- 6 Da uwem Solomon domo ye eke Paul.
- 7 Jesus eketiñ nso abaña ndidia ofuri ererimbot?